

Lou cassadou (3)

-E dounc, hòu, hilh dou diàble, qu'èt beroy lèste, n'èy pas estouan se n'abèt pas nat câ, que debèt gaha lous lebrauts au méy à couërre. Toutû, n'abèt pas dilhèu pensat de y bouè ha dab aquèste pur sang ». Lou cassadou, arreberat, que hé sinnes que nou poudè pas méy abé l'alet. Lous cabaliès que debarèn de las loues mountures, e lou brigadiè que balhè la soùe ta tiène au soû coumpagnoû. La care enlusernade de plase, que-s dén ûe clignade.

- E dounc, e ba miélhe, se hé lou goàpou galounat en truncan sus l'espalle dou gouyat qui parechè tout estranglat. – Moun Diu, se respounou aquèste, que souy urous que-m ayat gahat, sinou que-m anàbi estoufa. Toutû qu'èy triste de pensa que, per abé gahat û mèrlou, que souy autan cassat que s'abi tuat pay e may. Escusat-me de-b at gausa dîse, més que cau créde que soun hère àsous lous qui hèn las léys à Paris. Que baleré miélhe qu'aquèstes aharots que-s gabidèssen enter biarnés. E quoan dounc m'en ba cousta d'aquèste hèyte ?

-Que-b at diseran à Pau. D'aulhous, que paguerat drin méy per s'abé hèyts couërre, e drin méy encoère per abé afrountat lou goubernamén de Paris. Més n'abèt pas l'âyre d'esta trop coucàrou, aquères manètes ne soun pas de nat truque-tarroc.

-Aylas, très més a, alheyttat que languïbi, més toutû qu'èy sus you quàuques sourilhots, perqué nou-s arranyerém pas en boûs amics ? Bam, quoan boulét enta cadû, e-n y a prou dap û papè de cinquante liures ?

-Carat-pe, e respounét à las noustes questioûs, se hé lou brigadiè qui badè furious, sinoû que diseram que-s abét bouluts croumpa, e nou-b en sourtirat pas dap û papè dous grans. Digat-me quin p'aperat, e d'oun èt ?

-You ne-m apèri yaméy, brigadiè, més que sèy toutû quin m'apèren lous àutes. Soulaméns, lou mé payboû qu'ère bàscou, aquèts noums bàscous nou soun brigade paréns dous mouts biarnés. – You tabé que souy bàscou, se hé lou qui n'ère qu'û simple pàntou chéns nat galoû, e bàscou de Sen-Palays. – Tu, barre-la, e bous, gouyat, amuchat papès se-n abét, enta escribe coum cau lou bòste noum. »